

COMUNICATO n. 334 del 12/02/2026

An darkhenn vor djunge fraiböllege, organisatziongen un vor prodjèkte übar di grentzan

An darkhenn vor djunge fraiböllege 2026, di kandidatùrn soìn offe sin atz 27 von hornung

[Cimbro] An prais übar di grentze vor di pestn djungen fraiböllege: vorz djar 2026 o, dar Trentino, dar Südtiról un dar Tiról tüan offe di kandidatùrn vor in “Darkhenn vor djunge fraiböllege - Glanzleistung di pestn sachandarn”, pittnan euroredjonàl vèrt. Dar darkhenn iz vor djunge boda hãm gemacht gantz garècht un vor mearara zait, fraiböllege arbatn vor di kamöüschaftn.

Zbisnen in kandidatùrn boda bartn zuarrivan bartnda khemmen zornìrt, vüñf individuèll aktivitet un ändre zboa prodjèkte gemacht vo khnöpf. Berda åvorst mocht gehöarn atz feroine odar organisatziongen boda arbatn åna zo gebinna un boda hãm soìn setz in di provìntz vo Tria. Di arbatn mochan eppaz hãm getrakk guatz in di lentar von Trentino. ’Z barta o khemmen darkhennt a prodjèkt boda iz khent gemacht übar di grentzan, boda innvånk feroine odar organisatziongen von drai Lentar vodar Euroredjong. Di kandidatùrn mochan khemmen inngètt vor an vraità atz 27 von hornung 2026.

“Bar gloam azta disa okasiong saibe a bichtega oportunitét zo geba vèrt in djungen fraiböllegen un alln in sèlln arbatn, åna gebinn, boda khemmen vürgevüart in Trentino un boda meritàrn z’soina darkhennt azpe ’z hatt z’soina. Zornìrn z’arbata fraiböllege in ünsarne lentar iz eppaz boda khint abegètt vo djeneratziong in djeneratziong un iz toal von schatz vo alln ünsarn laüt” asó hatta khött dar vorsitzar vodar autonome Provìntz vo Tria, Maurizio Fugatti.

Di kandidatùrn mochan khemmen inngètt durch mail in Dianst vor di zungmindarhaitn un auzantn sachandarn, serv.minlinguistiche-relesterne@provincia.tn.it, auzvüllante in formulàr. Aftz disan formulàr mochte khemmen geschribet garècht un hoatar bazta iz khent getânt, bele aktivitet ’z soinda khent gemacht odar bele prodjèkte. Pittnândar pinn formular mochtma khlupm di khennkart von legal vortretar vodar feroine odar vodar organisatziong un di privacy informatif untargeschribet.

Aniaglaz boda åvorst makse kandidarn lai vor a kategori, alumma odar in khnopf. Ma mage khlupm panândar in curriculum vitae von sèlln boda khemmen kandidat.

Dòpo Tria ’z djar 2025, di zerimonie zuarzogeba in darkhenn bartze haltn ka Poatzan atz 13 von madjo von 2026.

Da gekhluppet: di formulér zo kandidarase un di privacy informatif

Übarsetzt von Schaltarle vor di zung von Toalkamou vodar Zimbar Hoachebene

